



**Nr.01.156-2011**

Në bazë të nenit 11 dhe 12 pika 12,1 të Ligjit mbi Ligjit Vetëqeverisjen Lokale nr.03/L 040 dhe neni 74 i Statutit të Komunës së Hanit të Elezit , Kuvendi i Komunës me datë 27.12.2011 miratoj:

**RREGULLORE  
PËR  
NDARJEN E BURSIVE PËR STUDENTË**

**I. DISPOZITAT E PËRGJITHËSHME**

**Neni 1.**

Me këtë rregullore përcaktohen kushtet për aplikim, kriteret dhe procedurat e përzgjedhjes së përfituesve të bursave, formimi i komisionit dhe e drejta e ankesës.

**II. SIGURIMI DHE SHFRYTËZIMI I MJETEVE**

**Neni 2**

Mjetet për bursa sigurohen nga buxheti i Komunës së Hanit të Elezit dhe nga donatorët.

**Neni 3**

3.1. Kuvendi i Komunës në bazë të mjeteve të ndara nga buxheti i komunës dhe eventual të ndonjë donatori vullnetar për ç' do vit cakton numrin dhe shumën e bursës dhe cakton drejtimet prioritare.

3.2. Prioritet kanë studentët prej vitit të dytë e më lartë.

**Neni 4**

4.1. Një student nuk ka të drejtë të marrë dy apo më shumë bursa nga njësitë buxhetore apo burime të ndryshme, përjashtim ka për ato studentë që marrin bursë universitare.

4. 2. Nëse vërtetohet se studenti që është përfitues i bursës nga komuna është duke marrë bursë edhe nga ndonjë njësi tjetër buxhetore ai obligohet ta kthejë bursën e komunës.

**Neni 5**

5.1. Prej një familje mund të merr bursë vetëm një student ( përjashtim bëjnë fëmijët e dëshmorëve).

5.2. Nga studentët që i takojnë të njëjtës familje që plotësojnë kushtet për përfitimin e bursës do ta përfitoj bursën studentit që ka notë mesatare më të lartë.

**III. KUSHTET PËR APLIKIM**

**Neni 6**

Të drejtë për të aplikuar për bursë kanë të gjithë studentët të cilët:

- a) janë banorë rezidentë të Komunës së Hanit të Elezit,
- b) janë student të rregullt, por jo me vet financim,
- c) kanë të dhëna të gjitha provimet e vitit paraprak,
- d) të mos jenë përsëritës të vitit,
- e) e kanë notën mesatare 7,00 e më të tepër,
- f) të jetë student i Universitetit Publik të Kosovës.

#### **IV. KRITERET PËR PËRZGJEDHËJE**

##### **Neni 7**

7.1 Fëmijëve të Dëshmorëve të Luftës së UÇK-së iu ndahet bursa pa kriteret.

7.2 Vlerësimi kandidatëve bëhet me pikë, duke e shumëzuar notën mesatare me koeficientin 5.

7.3 Studentëve të vitit të parë u merret nota mesatare e suksesit të shkollës së mesme të lartë dhe numri i poenëve të provimit të maturës në afatin e Qershorit ( afati i Gushtit nuk merret parasysh)

7.4. Përveç pikëve nga paragrafi paraprak , studentëve që u takojnë kategorive të veçanta u shtohen pikë si në vijim:

- a) Fëmijës së invalidit të luftës i shtohen 20 pikë,
- b) Studenti i cili është veteran i luftës i shtohen 15 pikë
- c) Fëmijës së veteranit të luftës i shtohen 15 pikë
- d) Fëmijës së martirit të luftës i shtohen 10 pikë
- e) Fëmijës së të burgosurit politikë i shtohen 15 pikë
- f) Studenti i cili është hendikep i shtohen 15 pikë
- g) Studenti i cili ka njërin prind të hendikepuar i shtohen 10 pikë
- j) Studenti i cili ka të dy prindërit e hendikepuar i shtohen 20 pikë
- h) Studenti i cili e ka gjendjen e rëndë sociale i shtohen 10 pikë
- i) Studenti i cili nuk e ka njërin prind 10 pikë
- j) Studenti i cili nuk i ka të dy prindërit i shtohen 20 pikë
- k) Studenti që ka marrë diploma, mirënjohje, certifikata kombëtare ose ndërkombëtare në ndonjë garë – konkurs në lëmin arsimore i shtohen 10 pikë
- i) Familja bërthamë që ka dy e më tepër student i shtohen 10 pikë,

#### **V. KONKURSI**

##### **Neni 8**

8.1. Bursat ndahen në bazë të konkursit publik.

8.2. Drejtoria e arsimit bënë shpalljen e konkursit publik në tabelën e publikimeve pranë Komunës së Hanit të Elezit, në Web faqen e komunës dhe në median lokale nëse ka.

8.3. Konkursi duhet të përmbajë:

- a) kushtet për konkurrim.
- b) shumën e bursës për një vit kalendarik.
- c) dokumentet e nevojshme për konkurrim.
- d) profilet prioritare.
- e) afati për aplikim është 15 ditë kalendarike.

##### **Neni 9**

9.1. Marrja dhe dorëzimi aplikacioneve bëhet në Qendrën për Shërbim të Qytetarëve të Komunës.

9.2. Zyrtari që bënë pranimin e aplikacioneve duhet :

- a) të kontrolloj dokumentet e aplikimit nëse janë apo nuk janë të kompletuara,
- b) të regjistroj dokumentet që i bashkëngjiten aplikacionit,
- c) të vërtetoj a është fotokopja e indeksit identike me origjinalin.

## **Neni 10**

10.1. Dokumentet e nevojshme për konkurrim:

- a) certifikata e provimeve të dhëna së bashku me fotokopjen e indeksit.
- b) deklarata e bashkësisë familjare.
- c) dëshmia se është invalid i luftës, se është fëmijë i dëshmorit, veteranit të luftës, martirit të luftës, se është person me aftësi të kufizuara dhe se është nga familja në skemën sociale.
- e) certifikatën e vendbanimit,
- d) diplomat, mirënjohjet, certifikatat për suksesin e arritur në gara-kurse kombëtare dhe ndërkombëtare në lëmin arsimor.

10.2. Studentët që janë invalid të luftës, anëtar të familjes së dëshmorit, invalidit të luftës, veteranit të luftës, martirit të luftës, me gjendje të rëndë sociale, student me aftësi të kufizuar duhet të sjellin dëshmitë nga shoqatat dhe institucionet përkatëse.

## **VI. FORMIMI I KOMISIONIT**

### **Neni 11**

11.1. Drejtoria e Arsimit për çdo vit formon komisionin për ndarjen e bursave prej 3 anëtarëve.

11.2. Komisioni zgjedh kryetarin e saj që udhëheq me punën e komisionit dhe nënshkruan vendimet e komisionit për ndarjen e bursave.

11.3. Detyrat e komisionit janë :

- a) të verifikoj afatshmërinë e aplikacioneve dhe kompletimin e tyre me dokumentet e kërkuara,
- b) të bëjë vlerësimin me pikë të aplikuesve sipas kriterëve të parapara në këtë rregullore dhe përpilon listën prioritare,
- c) të publikoj në afat prej 3 ditë pune vendimin me emrat e përfituesve të bursës në tabelën e shpalljeve dhe në ueb-faqen zyrtare të komunës, pas miratimit nga Drejtori i DKA-së.

## **VII. PROCEDURA E ANKESAVE**

### **Neni 12**

12.1. Kundër vendimit të komisionit mund të ushtrohet ankesë në afat prej 8 ditësh nga dita e publikimit të vendimit për përfituesit e bursës drejtuar komisionit për ankesa dhe parashtresa të Komunës së Hanit të Elezit.

12.2. Vendimi i komisionit të ankesave është përfundimtar në procedurë administrative.

## **VIII. DISPOZITAT KALIMTARE DHE TË FUNDIT**

### **Neni 13**

13.1. Kjo rregullore miratohet nga Kuvendi i Komunës së Hanit të Elezit sipas procedurave për miratimin e akteve normative..

13.2. Ndryshimet dhe plotësimet e kësaj rregulloreje bëhen sipas procedurave për miratimin e akteve normative.

13.3 Për zbatimin e kësaj rregullore, përgjegjës është Drejtoria për Arsimi, Kulturë, Rini dhe Sport e Komunës së Hanit të Elezit.

### **Hyrja në fuqi**

#### **Neni 14**

Kjo rregullore hynë në fuqi ditën e miratimit nga Kuvendi i Komunës së Hanit të Elezit.

**Hani i Elezit**  
**Data: 27.12.2011**

**Kryesuesi i Kuvendit**  
**Menduh Vlashi**

---